



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,
CARDINALITIIS DISPUTATIONIBUS
*manè discutienda in Scholis Medicorum, die Jovis decimâ nonâ
Februarii M. DCC. XXXIX.*

M. THOMA - BERNARDO BERTRAND,
Doctore Medico, Præside.

An aqua patus omnium saluberrimus?

I.



ERE, cibo, potu, vivimus. Si cum delectu usurpentur hæc tria, vita manat felicior. Eligantur indè salubriora. Ab aëre puro, innubi, libero; sensuum acumen, ingenii bonitas, robur virium. Aëre non certo contraria iis sunt. Esculenta, ter quaterve partitis ex intervallis assumpta die, crassiora licet, sed masticata diù, cuius profunt, si, ut par est, concoquantur. At leviora nocent avidius deglutita, ingesta præsertim semel tantum die. Tunc indigesta sæpiùs omni cum noxâ ventriculum non modò gravant,

A

sed illico, aut in posterum omnem pervertunt æconomiam animaleam, omni cum functionum læsione. Cavendum ideo, ne nimis incaute ingeratur. Digerere opus princeps. Igitur qui masticationem nescit, is animam odit suam, & sibi metipsum, etiam in seculo, infestus est. Præter hæc, tempestatum, regionum, ætatum, valetudinisque & exercitationis modo atque ratione, eligenda sunt convenientiora, & qualitate, & copiâ, & ordine. Potulenta nec minorem diligentiam requirunt. Eorum, ut ingens necessitas, ita & salubritas maxima. Id omne quod pro corporis sumitur alimonia, ipsius & naturâ potius salubritas committitur, assimilaturque felicitas. Nutrimur enim, ut, id, quod jugiter deperditur & avolat, in corporis substantiam magis propriâ vehiculi conditione reparatur. Quibus ergo tantum sapit palatus, iis cor non sapit.

I I.

UT potuum diversa sunt genera, sic optimum credere par est, quod universum est. Præstat illud, quod omnium animalium extinguendæ sitis, communis mater providaque paravit natura. Ars suos conficiat parentem potus, coctione florum, radicum, seminum; succorum expressione & fructibus & racemis, pomaceum, pyraceum, vinum: ex ipsis flammeos ignis ope extorqueat liquores: tot potuum sint, quot species fructuum? Hic portionum ordo est ad tuendam reparandamve sanitatem, ut, quæ vinosa sunt magis, sint salubres minus; Quæ aquæ, salubriores. Vinum, vegetantium licet decus nobile, vitam passim jucundior, sed infirmior breviorque sæpius facit. Succus est ex maturis calcatisque uvis expressus, defæcatus fermentatione, At ebullitionis fervore superbior. Spiritu volatili sulphureo, & acido subtili constat, undè tyrannidem exercet. Si meracius bibatur, bilem vel facit, vel accendit; si copiosius, turpi vomitu, artuum tremore, sexcentis id genus, omni cum animi perturbatione, & mentem, & corpus à sede dimover. Id vino debent homines, quod soli animalium non sitientes bibant. An cum sanitatis detrimento? Judica.

I I I.

TOT à vino mala præcavet aquæ potus. Argenteus limpidusque ille liquor, orbi universo cœvus & communis, fluidissimus est. Particulis constat jugi motu concitatis, quæ vitris opticis undulatâ motione accuratius exhibentur præditæ. Istæ particule læves sunt, solidæ, tenues, sphericæ, seu spheroides, aut oblongæ, aliæ ex physicis figuræ; undè habet aqua, ut corporibus immisceatur, & ea penetret. Eligi illa debet, pura, illimis, pellucida, levis, inodora, non acris, non salsa, palato grata. Facile calefcit, frigefcat, distribuatur. Talis est, Parisiorum altor, sequana sanus, qui urbi reginæ allabatur, & omnis qui è vivo fonte manat, quamque jam salutat sol maturinus è sublimioribus erumpentem locis. Quæ scaturit unda per ductus purissimos, item sana est; ut illa, quæ è vernis Hibernisque nubibus, minimè impuris nec procellosis, depluit: Quæ cysteris laudabili sabulo instratis sinè plumbo custoditur: Quæ ventri & hypochondriis minimè gravis est. Tales aquæ rei omnis viventis potus. Aquâ nutriuntur plantæ & crescunt, ut genus omne

animantum. Mentha in vasculo aquâ referto radices agit, & folia. Salix arbor in terrâ, ut dicunt, mortuâ, si aquâ purâ perfundatur, molem & legitimum acquirit. Aquatili pecori spiritus ab aquâ. Suave elementum, aqua est, Chymicumque principium, animatis corporibus & mixtis necessarium maximè, maximique ad vitam generationemque momenti.

I V.

UNDA purior, cæteris potibus fermentatis, longè salubrior est. Cibi vehiculum est, & præstantius. Non pro arbitrio, sed necessitate, ingeritur: omnique feliciùs alio distribuitur potu. Palato non tantùm sapit; sed villos molles, fibrasque flexiles fingit semper asperiores à vino. Pureum laticem, singulosque & omnes corporis humores ex naturæ votis fluidos reddit, à Baccho nimium salibus hispidos. Has aquæ dotes experiuntur præsertim, qui invigilant litteris. Quò magis utuntur aquâ, eò sunt vegetiores: faciliùs vident, sentiunt alacriùs, sapientiùs ratiocinantur, maturiùs judicant. Sanitatis tutor est aqua. Hæc dissolvendis cibis, constituendoque chylo cæteris aptior. Caput & ventriculum non tentat, ut vinum, appetentiam non dejicit, sed excitat. Hujus ope mucus tenax & viscidus stomachi & intestinorum detergetur; flatus à crispatis induratisque fibris, hypochondriacorum fons & origo, discutitur; laxatur fibra, fluit humor. Miranda utilitas aquæ. Iners alimentum accelerat, spissum solvit, obtundit acre, salsum mitigat, serosam colluviem per renes convehit, præcaverque calculum, & arceet podagram. Ut puritas omnis à vino, adida, corrumpitur, sic mens ab eo libera non inquinatur. Novum enim non est, sapientiam adumbrari vino. Profectò libidines, mania, flava atraque bilis, à vino accensæ, ab aquâ potenter arcentur. Attamen insalubres aquas, crudiores, puteales, nivales, stagnantes, emendat pauxillum vini. Ità cruciatus colici, morbi articulares, Broncocele, id genus, præcaventur: Ità, qui stomacho sunt debili, iis, ut Timotheo, paululùm vini conceditur, & tutè: Ità tandem vino, sed modico, temperatoque semper aquâ, quædam inest salubritas. Interim pauci sunt, etiàm ex iis, qui labore improbo victum quaritant, sat robusti; qui & vino & è vino elicitis diù tutoque indulgeant.

V.

ET si animalium corpora igne foveantur & vigeant, nativus tamèn ille calor contemperi deber. Effracto carcere, corporum integritatem citiùs deuret ignis, nisi aquâ, veluti compede, retineatur. Undè natura nulli non humiditatem circumfundit. Hæc, quia semper consumitur, semper amat consentientibus reparari partibus, quæ eò salubriores sunt, quò magis agunt necessariò. Economiam animalem non solum servat aquæ potus; sed & ipsos sanat arceatque morbos. Morbus ferè omnis oritur à villorum rigiditate & spissitudine fluidorum; indè cæco quodam carpitur igne humana constitutio, brevè peritura, ni temperetur. Ab inanitione enim rarè morbi fiunt. His in casibus extinctus naturalis calor, cardiacis restaurandus; in cæteris, insitus calor compescendus est.

4

Cùm igitur omnes ferè contrà naturam affectus, à caloris exuperantiâ promanent, repagulis eget ille innatus calor. Alias ignis in igne foret, & citò cinis, Morbus, sine quo pauci pereunt, febris est. Hæc, extracto sanguine, tenui diætâ, & præsertim aquæ largo cessat potu. Cholera morbo quid sævius? Illius impetum comprimit & sistit aqua; si sat copiosè epotetur. In Tetano pariter rigorem solvit. Frequenti aquæ potu, musculi, qui, tunc quasi sunt ferrei vectes, sensim mollescunt; febrisque, si supervenerit intrâ quatuor dies, morbum sanat. Tot commoda, similiaque, ut in podagrâ, variis ventriculi affectibus & capitis, profert intus aqua: tot, nec minora præstat extus. Decocta, capitis mulcet dolores. Affusa tepidè, fractis, luxatis, contractis artubus & resolutis, amica est, ut & ulceribus tumoribusque. Balneo, obstructa reserat, urinam movet, & diaphoresim, & secessum alvi; solvitque obstructiones, fomites morborum. Injecta, dura emollit, aperit densa, tensa laxat, crassa digerit. Hæc nonystemata, sed res. Utramque servat aqua valetudinem. Hic, quia nostra non est quæstio, de Mineralibus aquis, quæ terræ visceribus vires facultatesque quaritant, & de earum eximiiis dotibus, addimus nihil. An incredulus adhuc? Vini potatores, abstemiosque consulas. Hi plerùmque vitreâ valetudine & antè tempus pereunt: Illi solito sunt longioris ævi, mentisque sanioris.

Ergo aquæ potus omnium saluberrimus.

Proponēbat Parisiis, LUDOVICUS - ALEXANDER
VIEILLARD, San-Laudæus Constantiensis, Baccalaureus
Medicus, A. R. S. H, 1739, à sextâ ad meridiem,